



Inatsisartuni ilaasortaq  
Hans Aronsen, Inuit Ataqaatigiit  
maani

**Sinerissami aalisakkanik tulaassiffiulluartartuni usinik assartuussineq pillugu §  
37 naapertorlugu apeqquteqaammut 2018-002-mut akissut**

02-02-2018  
Suliaq normu: 2018 - 1260  
Dok. nr. 27105340

Asasara Hans Aronsen

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

8. januar 2018-imi sinerissami aalisakkanik tulaassiffiulluartartuni usinik assartuussineq pillugu Naalakkersuisunut apeqquteqaateqarputit. Apeqquteqaatinnut qujanaq. Apeqqutit uannut akisassanngorlugit innersuunneqarput.

**1. Sinerissami inoqarfinni aalisakkanik tulaassuiffiulluartuni usinik  
assartuussineq pitsanngorsaavigneqarniarpa?**

Akissut:

Royal Arctic Line-mut isumaqatigiissutitsinni sinaakkusiussat iluanni pitsanngorsaaniisaq Naalakkersuisut sulissutiguarpaat. Usinik assartuussisarneq ukiut tamaasa angalanissanut pilersaarutinit pingaarnernit aqunneqartarpoq. Angalanissanut pilersaarutit pingaarnernit atuutlernissaminnut ukiakkut akuerineqartarput. Ukiup tullianut angalanissanut pilersaarutit pingaarnernit suliarineqarnerini ukiumi ataatsimi usit amerlassutsimikkut allannguuteqartarnerat isummersuutitut ilaatinneqartarput.

**2. Imaluunniit tulaassuiffiulluartuni tunitsivitsigut ulikkaartuukulaarfiusuni  
immikkut usinik assartuussinermi aqqiissuteqartoqarsinnaava?**

Akissut:

2017-imi ukiakkut ataatsimiinnermi imm. 40 suliarineqarpoq, taannalu misiligummik qerititsivilersuinissamut aningaasaliissutissanik 7,5 mio. koruuninik pilersitsinissamut tunngasuvoq. Immikkoortup suliarineqarnerani Naalakkersuisut nassuiaammik, nunaqarfinni qerititsivinnik misiligummik pilersuinissamut annertusititsinissamullu qanoq iliorlutik naapertuunnerpaamik katiterisinnaanerannut atulersitsisinnaanerannullu allaaserinniffiusumik saqqummiussinissamut peqquneqassasut aalajangiunneqarpoq. Nassuiaammut ilaatigut kommunit, inuussutissarsiutinik ingerlataqartut aamma KANUNUPE-p misilittagaat ilanngunneqassapput, aammalu isumalluutitut, suliffissaqartitsinermut aningaasaqarnermullu tunngatillugu eqqarsaatigisassat ilanngunneqassallutik. Nassuiaat 2018-imi ukiakkut ataatsimiinnisaq sioqqullugu Inatsisartunut agguanneqassaaq, taamaallunilu nassuiaammi inerniliissutaasut 2019- imut aningaasanut inatsisissatut siunnersuutip suliarineqarneranut ilanngunneqarsinnaassapput.

### **3. Usinik assartuussineq RAL-ip kisermaassiffigiinnassavaa imaluunniit allanik usinik assartuisinnaasunik periarfissaqartitsivugut?**

Akissut:

Piffiit ilaanni akuersissuteqarnermut isumaqatigiissut avaqqullugu assartuussinissamut immikkut ittumik akuersissuteqartoqarsinnaavoq. Tamanna pissappat akuersissut isumaqatigiissutaasoq malillugu Royal Arctic Line assartuussinermik naammassinninnissamut neqeroorfigineqaqqaartussaavoq, tamannalu pisinnaangippat pisuni ataasiakkaani assartuussisartup allap, aammattaaq Naalakkersuisunit akuerineqartumik, suliassaq tigusinnaavaa.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga

Erik Jensen